

滙豐新大堂招財有法



滙豐派員介紹新大堂特色，揭開冬暖夏涼奧秘。（黎達豪攝）



大堂安裝咗六十部四十二吋 Plasma，播放滙豐歷史圖片。

近排翻風忽冷忽熱，如果屋企個坐向唔好都幾易病。尋日滙豐安排記者參觀滙豐總行啱啱裝修好嘅新地下大堂，唔知係佢哋塊地旺定風水好，一入去就覺得好舒服自在，冷熱啱啱好。之後我哋同負責幫滙豐做裝修設計嘅公司負責人傾偈，先知原來佢哋新大堂嘅氣壓度做咗手脚，唔怪得入到去連條氣都順啲啦。

如果大家問屋係西斜嘅話，都會知道一到夏天，太陽就曬晒入屋熱死，到咗冬天，就食正西北風。聽滙豐職員話，原來滙豐總行一向都有西斜嘅問題，一到下晝，太陽就曬正辦公室，校25度嘅冷氣根本係唔得嘅。

但係今次滙豐總行嘅新裝修大堂，就加裝咗啲特別嘅吹冷風口，呢啲冷風嘅風速仲特別快，令大堂嘅氣壓較大堂以外為高。咁樣夏天嘅濕熱氣同冬天嘅冷空氣就入唔到大堂裏面，唔單只做到冬暖夏涼嘅效果，仲可以慳番啲電，難怪一入到去就覺得咁聚財啦。